
EW KARWANÊ HEŞT HIZARÎ

Nişan Bamernî

Ew nêrgizên..

Xunava xwe ji şevbayê keviyan girtî

û

Xîsara bejina te av dida

Ketin ber hewên kopekan

Di ber biskan re şewitîn

Barovî ji pirça te dizî û..

Bêhin neda,

Li bin tekelên ..îva û zîlan

Ax bû birîn

Hensa min..

Bû srîneka toza şayayî

Di gel hêtîna ruhê çû,

Ewrên kujek..

Lê êwirîn

Kirin babelîsk û

Beserûşînîyê dirîn,

Di hinavên..

Ew ê biyabana hişk de

Xwîz..heldipeqijî û

Dibû saçimê û

Ji birînên

Befrêka tînî dibarîn,

Xwîn

Di mencela..

Nugretselman de difrriya

Efrîtan bihina wê hildimijî û

Reş e seyên..
Heçacê har..dialîsî,
Ew biyaban
Dibû dehbe û
Goşt ji qereqodan diwêrojî
Di dozekxa zikê wê de
Şel û şepik..
Ji bihina mirinê qemiyan
Bûne tîverêz û tîtal
Li ser hestîkan helaweriyan
Êdî..êşan..
Di nav..
Kumira bedena min de neman
Agirê wan dibû kenî û
Di çavên evîna te de digeriyan,
Rondik.. ji wan
Davên hîzara serê te
Dibûne kifin û
Di wê jivana berze de

Xwe di darbesta eşqê werdikir û

Li ser milên behîçinan..
Rê lê berze
Nedizanî kîve diçûn û..
Dê kêve çin..
Lewma.. heya niha
Pirça dayika min
Li ser şeyê xemê aloz dibe û
Çaverêbûneka kor e..
Li serê rêyan vediçire,
Zêmara di sîngê wê de..
Helemûrek a jana ye û
Hêş kovaneka..
Devtîj a cerg bire, zarokên wê..
Li dîw bihna xwînê diçin
Xerîbin ew
Ji babê xwe têr nebûne û

Di hembêza henekan de
Qebokanê û..
Binkefişkanê germ ne kirine,
Hêş..
Ew şev e..
Bîst û sê salan dirêj bûy..
Ya mayî..
Bêdawî nebûye,
Merg..
Xewneke
Bi kabîsê hiziran re diçe û
Li heşt hizar..
Barzaniyên te digere
Di şevereşa rêya te de
Di gel rijiyana stêrkan digre û
Ji hêza wan
Tirojkên jiyane çê dike
Roj..
Di destên min de
Esîr dibe,
Bêdengiya elindeka sipî
Ji goristana hestîkan
Radibe û
Berev rengên..
Alaya pîroz ve diçe
Ew deryayê ji rondikan
Di asmanê çavên te de
Bûye şêre
Ji keskûsorî vedibe û

Hestîkên te û
Wan kiloxkên dev bi kenî
Ji toza biyabanan dişo û
Radibin ve,
Mirin..
Li hemberî..
Hevrikaniya te,
Ji xwe şerm dike û
Ji hebona te dikeve,
Lê..
Dîsan jî
Li ser giyanê axa te
Şinwarên qamçiyên reş in..
Jê neçûyine,
Ew birînên gulên sumtîn..
Di germ û geş in..
Sar nebûne
Û dê mînin.. û dê hêlîn
Û dê keyne
Tabloyên perwerda kurdî
Da ku sibe
Ew karwanê heşt hezarî
Raneweste
Di gel nîşên dîroka me
Zindî bibe û
Biçe, biçe, biçe
Û biçe,... Û biçe,... Û biçe,

30/6/2006/vêsteroş